

**Vischnaunca da Mustér**

**Lescha davart l'organisaziun en cass  
da crisa**

**2008**

## I. Disposiziuns generalas

### Art. 1

Intent Questa lescha regla la preparaziun, l'ordinaziun e l'execuziun da mesiras per proteger la populaziun encunter eveniments dalla natira ed encunter autras situaziuns extraordinarias.

### Art. 2

Dretg surordinau L'organisaziun en cass da crisa sco era tuttas mesiras ordinadas en quei connex ston satisfar allas prescripziuns dil dretg surordinau federal e cantunal.

### Art. 3

Egualitad dallas schlatteinas Las denominaziuns applicadas en questa lescha valan per omisduas schlatteinas.

### Art. 4

Principi L'organisaziun en cass da crisa cumpeglia tut ils agens mieds e tut ils mieds attribui che vegnan duvrai per reglar situaziuns extraordinarias ni catastrofas.

Ella sebase sin las structurass communalas existentas ed ademplescha sias incumbensas entras in'acziun coordinada e conforma al temps.

Sche questa lescha ni il dretg surordinau prescriba nuot auter, regla la suprastonza communalala l'organisaziun en cass da crisa ed elegia in stab da catastrofas. Ella relai in carnet da duers.

### Art. 5

Incarica Il stab da catastrofas ha las suandontas incaricas:

- prevenziun ed orientaziun dalla populaziun,
- proteger e salvar la populaziun, ils beins materials ed igl ambient,
- minimar ils donns,
- restabilir aschi spert sco pusseivel ina situaziun normala.

### Art. 6

Atgna responsabladad La preparaziun, l'ordinaziun e l'execuziun da mesiras decretadas dil stab da catastrofas e dallas organisaziuns delibereschans buca la populaziun dall'atgna responsabladad e dalla responsabladad per sesez.

## II. Stab da catastrofas

### Art. 7

Stab da catastrofas

Il stab da catastrofas communal secumpona d'in representant dalla suprastonza communal, dil menader digl uffeci da baghegiar ni da siu substitut, dil cumandant da pumpiers ni da siu substitut, dil selvicultur da revier ni da siu substitut, d'in representant dil survetsch da salvament ni da siu substitut e dil canzlist communal sco actuar.

Il stab da catastrofas sa consultar persunas specializadas.

Il stab da catastrofas vegn eligius dalla suprastonza communal.

### Art. 8

Incumbensas

Il stab da catastrofas ademplescha tuttas incumbensas tenor l'incarica. El ha surtut da

- a) giudicar la situaziun da prighel,
- b) controllar la promptadad d'agir e d'alarmar,
- c) prevegnir cun serrar vias e sendas,
- d) evacuar persunas ed animals en territoris periclitai,
- e) prender mesiras da salvament e d'agid,
- f) preparar documentaziuns d'acziun ed il carnet da duers,
- g) procurar per la scolaziun e la formaziun supplementara constanta, silmeins ina gada ad onn
- h) collaborar cun tiarzas persunas
- i) informar la populaziun davart las disposiziuns decretadas dil stab da catastrofas.

Incaricas specialas, adossadas ad autras organisaziuns cumpetentas, s'audan buca tier l'incarica dil stab da catastrofas, en special pensums reservai als pumpiers, acziuns da salvament reservadas al survetsch da salvament sco era tuttas mesiras da prevenziun els territoris da skis e turas.

## III. Indemnisaziun e repartiziun dils cuosts

### Art. 9

Indemnisaziun ed  
assicuranza

Ils commembers dil stab da catastrofas e dil survetsch da segirtad vegnan indemnisai dalla vischnaunca tenor ils reglaments da salarisaziun dall'atgna vischnaunca ni ils contracts cun reglamentaziuns specialas. Per collaboraturs comunals vala il survetsch da catastrofas sco temps da lavur.

Duront l'acziun ein ils commembers dil stab da catastrofas e dils differents survetschs assicurai entras la vischnaunca.

**Art. 10**

Mesiras

Il stab da catastrofas pren en atgna responsabladad tuttas mesiras necessarias che seresultan dallas incaricas.

Las disposiziuns dil stab da catastrofas ein ligiontas per tuts e ston en mintga cass vegnir observadas. Quei vala surtut sche vias e sendas vegnan serradas, sch'ei vegn ordinau da star a casa pervia da prighels ed en cass d'evacuaziuns. Per exequir quellas mesiras sa il stab da catastrofas era far diever dalla polizia.

**Art. 11**Obligaziun da sur-  
prender ils cuosts

Cuosts che seresultan en connex cun las disposiziuns pridadas, surpren per ordinari la vischnaunca.

La vischnaunca sa denton era adossar ils cuosts a persunas privatas, sche las mesiras ein stadas en lur interess. Ils cuosts en connex cun in'evacuaziun van adina a quen dallas persunas evacuadas. Sche la vischnaunca ha fatg prestaziuns preliminaras, sa ella pretender ina restituziun dallas persunas pertuccadas.

Ils donns occurri (sco per exempel sperdita da paga) entras las mesiras (evacuaziuns, serradas da vias, etc.) dattan negin dretg da pretender indemnizaziuns.

Sch'ins vegn buca da secunvegnir davart la repartiziun dils cuosts, decida la suprastanza communal el rom d'ina disposiziun contestabla.

**Art. 12**

Responsabladad

Ils commembers dil stab da catastrofas san ni individualmein ni globalmein vegnir fatgs responsabels per eventuals accidents ni donns succedi.

**IV. Disposiziuns penalas e finalas****Art. 13**

Disposiziuns penalas

Tgi che cunterfa allas ordinaziuns dil stab da catastrofas, dil survetsch da segirtad ni da cumissiuns ed organisaziuns incaricadas cun incumbensas specialas, vegn castigiaus cun ina multa da tochen frs. 1'000.–, en cass da repetiziun entochen frs. 5'000.–.

**Art. 14**

Execuziun

La suprastanza communal exequescha questa lescha e relai las disposiziuns necessarias.

**Art. 15**

Entrada en vigur

Questa lescha ei vegnida acceptada ils 30 da mars 2008 ella votaziun all'urna. Ella entra en vigur igl'emprim d'october 2008.

Cun l'entrada en vigur da questa lescha vegnan tuttas disposiziuns communalas che stattan en cuntradicziun cun ella cassadas, specialmein il regulativ per il survetsch da lavinas dils 24 da settember 1982 sco era las disposiziuns executivas davart il reglament pil survetsch da lavinas dils 9 da november 1982.

Per la vischnaunca da Disentis/Mustér

Il president communal:

Il canzlist communal:

dr. Dumeni Columberg

Andri Hendry